

Reapertura di filial di Biblioteca Nacional na San Nicolas



ORANJESTAD – Diaranson anochi a tuma lugha e reapertura di Biblioteca Nacional Aruba (BNA) su filial na San Nicolas. Despues di un inversion di casi 1.6 miyon florin, y un trabou cu a dura mas cu un aña y mey, e localidad aki a bolbe haya su splendor pa sigui brinda su servicio, specialmente pa e comunidad di pariba di brug. Un aspecto cu a duna un toke special na e reapertura aki tabata cu finalmente e edificio aki tin un lift nobo, cu si ta traha.

E acto aki a conta cu presencia di prome minister, Evelyn Wever-Croes, Vice President di Parlamento, Alan How-

ell; minister di Educacion, Ciencia y Desaroyo Sostenibel, Armando Rudy Lampe y sra.; parlamentarionan Rocco Tjon y Endy Croes. Tambe tabata presente e director di BNA, Astrid Britten y personal di biblioteca, kendenan tabata masha entusiasmo cu e acontecimiento aki; y invitadonan special.

E hecho aki a bira un oportunidad pa bay bek den pasado y determina e rol importante cu biblioteca tabata hunga e tempo aya, como centro y fuente di informacion y investigacion. Awendia, esaki a mengua hopi debi na e impacto di e era digital y e accesibilidad di informacion via internet.

Historia

Den su discurso, Britten a indica cu na augustus 1951, ya caba tabatin autorisacion di Gobierno pa un filial na San Nicolas, cu e tempo ey tabatin un concentracion di hende mas grandi di e isla. Na cuminsamento di añanan cincuenta tabatin casi dos bes mas tanto hende ta biba na San Nicolas cu na Playa, esta 20.664 contra 11.670. Sinembargo, trabou di biblioteca tabata concentra na Playa.

A wordo pidi na Gezaghheber pa pone na disposicion un espacio adecua. Tanten, como solucion di emergencia, e miembronan di pariba di brug, pa compensa por a bay cu un cantidad dobel di buki for di Oranjestad. For di 1 di september 1951, ta e dia cu e filial San Nicolas a habri. Eseyan no ta parce circunstancianan ideal pa laga un biblioteca florece. Dia 18 di april 1952, cu poco interes, Inspector di enseñansa dr. W.J. Goslinga ta habri e filial na San Nicolas cu tabata situa na van Speykstraat. Es-

aki a sosode den presencia di Gezaghheber mr. P.G. Hooghoudt, B. Teagle di Lago, Inspector di enseñansa G. Kok y algun cabesante di scol. Na 1959, e biblioteca di San Nicolas a muda pa oficina auxiliar di Gobierno na Sint Maartenstraat. Diaranson, 25 di september 1959, e mudamento ta tuma lugha y dia 1 di december 1959 ta habri e alohamento nobo oficialmente. E apertura aki ta simbolisa emancipacion di San Nicolas. E habitantenan mesora ta muestra hopi interes, awor cu e orario pa fiamiento di buki a wordo amplia tambe.

E filial na San Nicolas, na e di dos piso di Oficina di Gobernacion Auxiliar, no tabata cumpli for di hopi tempo cu e exigencianan. Pero lo dura te prome di september 1989 prome cu inauguracion di sucursal San Nicolas na Peter Stuyvesantstraat 16 tuma lugha. E inauguracion a tuma lugha den silencio, pasobra no tabatin placa pa fiesta!

E prome renobacion di nos

edificio na Peter Stuyvesantstraat a tuma lugha na aña 2007, pero tabata dia 3 di december di aña 2009 cu a haci re-apertura di nos sucursal na San Nicolas. Diahuebs ultimo, despues di casi 10 aña, un bes mas a wordo efectua reapertura di BNA su edificio na Peter Stuyvesantstraat 16, na San Nicolas.

Britten a menciona parlamentario Howell, kende tabata e motor y kende a pusha pa e proyecto por a wordo realisa. Tambe na minister Lampe y tur otro nan cu tabata catalisado den e proceso aki. Igualmente, na tur trahadonan di BNA y muy specialmente na e team di e filial na San Nicolas. Na final, el a expresa palabra di danki den direccion di e miembro di prensa, Hilario Doncker, kende ta un persona cu semper ta interesa y preocupa pa e bon desaroyo di su distrito di San Nicolas. Tambe e tabatin palabra di pabien pa henter comunidad di San Nicolas y bisindario y pueblo di Aruba en general.